

Colosau nenacaauru rai

Faborohacha letoai leinjin

Chatohaneein neeiche Colosau neiniquichene.

1 ¹Canuna Cana Coaunera jerenohineein, rai Calaohi Jesocurisito letono- afosotoro Faboroneun. ²Jesocurisito coreniha cana nejera Timoteeo aina jiniiquiine caa quiricha laenacaanu, satiiin Cana Coaunera cachaneein, canacaanu suujua rijijieein Colosau Jesocurisito coreniha canacaanu nejeraneein neiniquichene rai. Cana Inaca Cana Coaunera jeelai amuritoheriin inara coroatajaneeine jiniiquiin raotojoeein neeichene coina.

Jesocurisito esenetaeraaru rai Cana Coaunera bajaa Faborone

³Inara rai Cana Coaunera bajaacaanune naineeine, itolere bana: “Narihara Cana Coaunera,” naain Cana Curuaanaa Jesocurisito Inaca Cana Coaunera coroaeaanu, ⁴aiha Jesocurisito esenetaain neein, satiiin Cana Coaunera cachaneein nenacaauru aina jiniiquiin ita belaa in neeichene coitucuhacaanune jaun. ⁵Inae dedeeu inara que banijiaain rucuhenojoneein nenea rariquicheeine cohajeiin neeichene jaunte, leeochoaauru aina ita belaa in neeiche. Cana osa caje cana ichoteraneein nenea erenea caohacha aonaquichene caje

coauneente, nii inaraacha cohajei sirichaaneein neeiche. ⁶Nii erenea inara rai beratenojoite, itolere chauratane sacutaain coitucuhin, inae rijijieein ichaaore cachaauru. Charijieein teeinti esinae rauhijiriin cana belaitoha Cana Coaunerane beeuruhane aonaaain, esinae rauhijiriin erenea nihane esenetaichelune rijijieein. ⁷Nii quete jeriha Jesocurisitone rijijieein inara relaa in nelu, nii jataain canuhacha belaneein nenea Efaforasi. Acate canacaanu amihaneon que canacaanu coroatajaneraneein, inara rai jeriha Jesocurisitone rijijieein cha ichaeraneein nenea ne. ⁸Aca techu canacaanu rai, inara suujuatiha Cana Coaunera Suujuene rijijieein leeochoaauru belaa in ichaohichene benaa belu.

⁹Nii jaunna coituhacaanune caje coauneein jianelanaala inara rai Cana Coaunera bajaacaanu, inara que jeelai amuritoheriin niicha jerei coitucueratein, itolere inaraacha ichai coitucuhin, rai Suujue jerenohin coitucuhin, naaonjoaainchene coina. ¹⁰Nii ainate Cana Curuaanaacha jerei rijijieein itolere caohacha nejesina ichaain neriquicheein, jeelai amuritoheriin Cana Coaunera coitucuhin coujuriu Cana Coaunera cachaneein nenea tocohaneein. ¹¹Nii coinana itolere

amurijiriin niicha ichana nainei aina cuaain, inara lararajiaa Cana Coaunerane, laraajiin nererojoeacela-naala neeichene coina bajaacaanu. ¹²Nii ainate rachoojoein, nii satiin notaracae rai cachaneein nenacaauru rai niicha teenu- rai Cojoanonaa raain neeichene coina, inara rai teranuneein nena Cana Inaca Cana Coaunera coroaquiche.

¹³Cana Coaunerate, cana curuaanaa-neein niha moconajaerane jana, caje cana ruluhin Cana Curuaanaa niha rai Calaohi Jesocurisitone coina rai Cojoanonaa que cana telu. ¹⁴Nii rai Calaohi corenihate cana osa caje cana ichoteratein, cana que suujua acatelu Cana Coaunera.

Ohalu Jesocurisitone corenihate Cana Coaunera aina raotojoein ichaohacache.

¹⁵Chabana Cana Coaunera coarahaacache niqui. Nete rijijieein nena- rai Calaohi Jesocurisiko coaracaache. Acate, jauriaanejein rai Calaoheinein nelu, itolere coaunaane ajiniha caje coaunein. ¹⁶Aina cuaain techu itolere dedeeu neenihuru, chauratane que neenihuru, chabana coanojoinelanaala neenihuru, chabana inanacaelanaala itolere ichana naineraneein itolere que mijiaaanein neenihuru, naonjoainuri coaunaeratelu Cana Coaunera. Satiin niichurute rainein nihane coina, aina cuaain coaunanojoein nelu.

¹⁷Nitohaneeinte itolere ajiniha nenaanelu Jesocurisiko. Chaen techu coreniha, Aca jerihane rijijieein neeure satiin niicha coaunaauri. ¹⁸Chaen techu satiin niicha ranojoein nenacaauru, rai iclesia neein neeure. Nii iclesiate Jesocurisiko jaberoco ne. Jana nii jaberoco coturite jeelai Jesocurisitohacha ne. Aca techu itolere ajiniha nihalune rijijiein, aca satiin

ajiniha o caje ichanaelu. Nitohaneeinte nelu, itolere que satiin ichoaichateraneein nihane coina. ¹⁹⁻²⁰Jesocurisiko aina itolere bana nena jerihane jaunte, aina cuaain satiin itolere cana rai chauratane, dede, cana janonaa, naonjoainuri que neein, que nejeratenaaneein neeuruhane caje, aina raotojoein neeuruhane coina ichaelu Cana Coaunera. Niite ichaelu, coroso que rai coichana jahoin ohalu Jesocurisitone aina cuaain.

²¹Jauriaalute niqui Cana Coaunera cacha nelanaala aina inara suujua cuhane que nejeratenaaneein neeichelu, nechu baasohacha ichajein ichaohichene jaun. ²²Nete laen inae enene, aina raotojoein rai cachaneein que banijiaaanein neeichene coina, inara que suujua acatelu Cana Coaunera. Nii coinat joanreen cacha rijijiein, atinanohinelu rai Calaohi Jesocurisiko. Nitohaneeinte inara coluocoelu, nacatiha cha ujuaihonelanaala, osa colane neeichene coina. ²³Nete nitohaneein nena jeriquichene, inara rai benojoiniha ichoteratenojoein neriquicheeine jaanune jana, aonaain esenetaaichelune rijijiein, leinjiin acaacha cohajein, leecha ichana coacuelanaala neeichene caohachae. Nii jeelai inara rai beratenointe, satiin chauratane sacutaain benojoineein ne. Chaen canu Faboro nichaunnena nii que cachaauru relaurera coroatajaneranein neun.

Jesocurisiko cachaneein iclesiacuru coroatajaneranein niha Faborone.

²⁴Ena inara coreniha necairichanaa coaracaane jaunna rachoojoeun. Nii Jesocurisiko jaberoco- niicha ranojoein nenacaauru- iclesiacuru coroatajanena quete Jesocurisiko corenranilha necairichanaa coaracae

cajabereeo. ²⁵Nitohaneeinte Jesocurisito cachaneein iclesiacuru corootajaneranein nihanune coina, canu telu Cana Coaunera, inara caohachanu que, inara rai niicha beratenojoi beebejihanu, aca jerihane rijijieeine coina. ²⁶Nii niicha coitucuerateite inoaenlu caje coauneein chuni que coitucueratela-naala asinojoneein sirilu Cana Coaunera. Nete laen inae enene, satiin rai cachaneein neinichaachene que coitucuerate. ²⁷Nii jataain caohachaneein niha Jesocurisitonete, satiin Jorionelanaala nenacaauru que coitucuerate Cana Coaunera. Nii asinojoneein nenea niicha coitucuerateite, Jesocurisitoneein inae inara suujueniha ne. Acaachate cohajeeiche.

²⁸Nii jaunna Jesocurisito que cachaauru relaacaanune, itolere niicha ichai coitucuhin ichacuruhane coina acaauru suujuatihacaanu, esinae rauhijiriin caohachaaain aca jerihane rijijieein, Jesocurisito rai tenajaacaanune coina. ²⁹Nitohanei amihanenaa ichacaanune coina canu lararajiaain, itolere ichana nainichaaunne jaanu tiha Jesocurisitone ainana caa niicha icharateite ichaain neeun.

2 ¹Laodiseau nenacaauru, chae inara, chaen chabana canu coaraelanaala nenacaauru- canu benaa caje cacoitucuureraauru, naonjoainuri neeichene corenihane, jataain mainajeriin necairichaaun. ²Nitohaneeinne caohachaaain rai suujua lararajiaain, jeelai amuritoheriin jiniiquiin corajeein, itolere bana ita belaaain neein, nii chuni que Cana Coauneraacha coitucueratelanaala nenea- Jesocurisito coitucuhin neeichene coina jataain laraajihun.

³Esinae rauhijiriin Jesocurisito coitucuhin neeichenete, rai caohacha aina itolere coitucuhin neriquicheein.

⁴Nabana chuni inara coritaa raotojoeein

inara rai ereein, osa que inara saruhane jana, esenetaaichene coataane caa inara rai beeun. ⁵Inara aina canu jaberoconeein nenihanune niha natiine, itolere bana canu suujua cuhane inara coacuun. Nii jaunna jiniiquiin rauhijiriin inaraacha ichai ichaain neein, Jesocurisito esenetaaichene jaun, aca jerihane rijijieein ichaohichene coitucuhanune jaun jataain rachoojoeun.

Ena nenea ichaonaa teraneeinte ne Jesocurisito.

⁶Nitohaniane jaun jeriha Jesocurisitone rijijieein ichaohichene coina esenetaaichelune jaun, itolere bana aca jerihane rijijieein ichaaoche. ⁷Aihana jaun, leinjiin acaacha jerihane rijijieein inara suujua aina cutaain ichaohin nii acaneein nenea rijijieein ichaohichene coina inara relauruhalune jaan esenetaaichelune rijijieein, itolere bana Cana Coaunera coroaecuche. ⁸Itolere que necohalajiin neeuche, nabana nechu joaereen nichao que inara coritaain nenea jereranihane, esenetaain neeichene coataa. Nii cacha coritaeraneein nenacaauru, coatiha Jesocurisitohacha jerei icharaneein neeuruhi. Acaaurute nechu Cana Coaunera coitucuelanaala nenacaauru cachaauru ichao que cacha relaaain, moconajaera icharatenohin icharaneein neeure.

⁹Jerichanejeeinte rai Inaca Cana Coauneraacha ichai ichana naineraneein ne nii rai Calaohi Jesocurisito. ¹⁰Nii jaunte Jesocurisito aina neeichene jaun, rai Inaca Cana Coaunera aina netonai neeiche. Nii Jesocurisitote, itolere que laraajiin satiin Cana Coauneraacha cocainanojoneein nenacaauru Curuaanaanein ne. ¹¹Chaen techu inae Jesocurisito aina neeichene jaun, inae

cojunacatenohineein neeiche. Coatiha rai jaberoco que coujunacatenohineein neeuruhalu Jorioocurune rijijieein nihei. Niite inae necoriha inara suujuane jaun, inoaenlu osa que nesarujueein ichaohichene jianeein neeichene jaan cojunacaneein rauhijiriin Jesocurisito caje unaa neein ne. ¹²Nii atinaain conauteno-joineein nihalune caje ichanaalu Jesocurisitone rijijieeinte, inara atinaain inara itajihane rai niha osane caje, Curisito aina cuaain nichoteeichene coujunacaniha acauhanau teein baotisa-nojoineein neeichelu. Nitohaneeinte neeiche, niicha ichana nainei ichaain oo caje ichateralu Cana Coaunera esenetaain neeichene jaun. ¹³Inara Jorionelanaala neiniquichenete jauriaa inara jaberoco que coujunacatenohine-lanaala neeichelu, jauriaanejeein nena Moisesa tenojoi rauhi tonoraelanaala nitajenaanein neeichelune jaun. Nete laen inae ena, Jesocurisito aina jiniiquiin ichaohichene coina, inara rai ichaonaa teein ne Cana Coaunera, nii Jesocurisito cana osa caje cana ichoterateraneein nihane jaun. ¹⁴Nii jauriaanejeein nena Moisesa rai rauhi tonoraenihacachene jaunte niqui, caseteco coaracaachene rai nihacachelu. Nete coroso que ohalu Jesocurisitone aina cuaain, nii itajeein nelu Cana Coaunera. ¹⁵Nitohaneeinte Jesocurisito aina cuaain, moconajaera aina rai letononeein nenacaauru amuritoheratelu Cana Coaunera, satiin coarajeeu-rera notaracae tenajaain.

Itolere dedeeu nenaacha que coacuhin neeuche.

¹⁶Aihana jaun, inara ichao que ichaohin, inara lenone que lenoneein, inara coco que cocohin, naaonjoaain neeichene, nihei chuni nii que ereein nena nainei. Jiaonrihachu nebetacanaa cojoanonaa

bitoaain neein, atene ujuarichuru bitoaain, naaonjoaauruhane rijijieein ichaohichene coina inara counujeeunruhane tonoraichene. ¹⁷Nete satiin necoreereein inae ecu tihane bana. Jana Jesocurisito tenojoi ichaonaa chabana necorerinaain, niheichu chabana satonorinaain. ¹⁸Jiaonrihachu baaso ichaa inara beein, acaauru rijijieein neeichene coina, inara rai aitiin neeuruha nii Cana Coaunera letono aanjeraauru letononiha nocoetiin, acaauru notaaca Cana Coaunerane beein, nechu jeriha acaauru suujuane rijijieein ichaohin necohasitaacha que nenacaaurune tonoraain neeichene. ¹⁹Jesocurisito cachaneein rai suujua cuhane sirichurenihane jaunte, jeriha Cana Coaunerane rijijieein, jiniiquiin neein ita belaa in ichaohacahene coina cana teein niha Jesocurisitone saijieein ita caje neleruha cachane jerecure.

²⁰Jesocurisito esenetaain neeichene jaunte, inae nii jauriaanejeein inara relaauruhalune jaan jianeein neeichelu. Aihana jaun, inae nainiheeiche ichaauruha Jesocurisito coitucuelanaala nenacaaurune rijijieein ichaohichene. ²¹⁻²²Nii jaiti Jesocurisito coitucuelanaala ichaohichene bana: “Jiaonriha dadaain, niheichu quiichene. Niheichu inara biji cuhane teberiana nainiheeiche,” naain dadaain quiichene caohatein inara relaauruhalune jaunte, nechu cachaauru suujua caje unaanein nihane jaun inae nitaje. ²³Esinaete chuhisi niqui rauhijiriin Cana Coaunera coitucuera rijijieein neein aitocure. Nete cana jaberoco cairichaeranein ne. Nii acaauru aitoonjoan osaacha que coacuhin nena caje cana suujua corenaa nainenihane jaunte, nii chaque nelatene.

3 ¹Nitohaneein inae ohin nitajena rijijieein neeichene caje Jesocurisito esenetaain neeichene jaun, rai Inaca Cana Coaunera aina jiniiquin,

rai raotono nichajai que niha Jesocurisitone jaan- dedeeucha que coacuhin ichaaoche. ²Nii jaun, inae nainiheeiche Cana Coaunera coitucuelanaala nenacaauru rijijieein coacuhin neeichene. Dedeeu nenacaauruhacha que coacuhin neeuche. Jiaonriha caa chauratane que nenacaauruhacha que coaauquichene. ³Nitohanihana jaun, inae jauriaalu nena inara ichao que ichaoheeiche, ena nena inara ichaote, Jesocurisito aina Cana Coaunera aina asinojoneein ne. ⁴Nitohaneein Jesocurisito, inara ichao sirichaneein nihane jaunte, inae ecu tihane bana nacoauneein turuhane bana, aina jiniichaain inara ocotilha ureein, aina jiniiquin necaohacha que ichaohichene coina.

**Jauriaanejeein nena ichaonaa
aina ena nena ichaonaa.**

⁵Aihane jaun, coaacuruha Cana Coaunera coitucuelanaala nenacaaurune rijijieein coacuhin ichaohichene jianecuche. Jiaonriha joanreein ene aina ichaohin, quicha nejesina neein ichaohin, ene nejesinaneein ichaohin, naonjoaain Cana Coauneraacha rautaainelanaala nena ichaain, chaelai siriquichene chunaain, naonjoaaincha que coacuhin ichaohichene. Nitohanei ichaonaate jataain cana ichao aasaatera ne. ⁶Nere tonoraalanaala nitohaneein ichaonacaaurute, jataain mainajein caseteaceratereein Cana Coaunera. ⁷Nii rijijieeinte inara netonai ichaorejetocoiche, jaiti necoreniha inara ichaone bana. ⁸Nete inae necoriha inara ichaone jaun, ita cotaairiin, ene aina ichaohichene coinaacha baasoneein coacuhin, inara amute cacha baijiaain, rautanacaai que ereein, naonjoaain ichaohichene jianequiche. ⁹Inae nitohaneein necoriha

inara ichaone jaun, jiaonriha jaiti necoreniha inara ichaone bana, inaraacha ichai ichaain, ita coritaain, naonjoaain ichaohichelune rijijieein ichaonaa nainiheeiche. ¹⁰Nitohaneente, ena nena ichaonaa que ichaohin, ena nena cachaneein nena rijijieein, jeriha Cana Coaunera rijijieein ichaohichene, itolereenein niicha jerei coitucuriquicheein. ¹¹Aihana jaun, coatiha chaque nelatihei, Curieconein, Jorionein, Jorionelanaala, leecha cachanein, cha coitucuelanaala cairicheineein, letononeein, letononelanaala, naonjoaain nihakane. Jesocurisito cachanein nihacanete, jataain itolere amurijiriin nelate.

¹²Jataain inara belaitohane jaunte, rai cachanein neeichene coina, inara janijiin inara raain nelu Cana Coaunera. Aihana jaun, coujurihu inara ichao coreein nena tocokanein esinae rauhijiriin cairichaaajoaain ita coaraain, ita coroatajanein, leechaauru amurijiriin nena coacuelanaala, ita que nererojoecaelanaala, naonjoaain ichaaoche. ¹³Jiniiquin ita que nererojoecaelanaala neein, tonaain itaque ereein neeuruha chunocohacurune, que inara suujua acateein, naonjoaain neeuche, inara que suujua acatein nihalu Cana Coaunera rijijieein. ¹⁴Itolere baaso caje inara suujua coreein, ita belaaain jiniiquin neeuche. ¹⁵Nitohanein neeichenete, inara suujua raujiareein Jesocurisito, raotojoein neeichene coina. Nii cointe inara raain nelu Cana Coaunera, jiniiquin rai jaberoco rijijieein neeichene coina.

¹⁶Itolere bana inara rai Jesocurisitohacha beratei coaacuche inara suujua cuhane. Inara suujua que coitucueratiha Cana Coaunera rijijieein, jiniiquin ita relaain, ita

suujua aninoain, chatohanai ichaain niha chunine coataa ita suujuateein, naonjoaain neeuche. Inara suujua aina cutaain Cana Coaunera corojeein, salmo que nenatein, itolere nenatena Cana Coaunera coroaenanaja que nenatecuche. ¹⁷Itolere inaraacha ichai ichaquichene, jeriha Jesocurisitone rijijieein aina cuaain ichacuche. Jerichanejeeinchu chaelai que ereein neeiche cacha raine, aca jerihane rijitjoeein ereein neeuche. Chaen chu, nii rai Calaohi Jesocurisito aina cuaain, rai Inaca Cana Coaunera coroaecuche.

Curisito ranojoein nenacaauru ichao.

¹⁸Inara ene neeichene, inara lanauru ere tonoraain jerecuruhane rijijieein neeuche, acaachate inaraacha ichaneneein ne, coujuriu Jesocurisito esenetaeranein nenea tochanein neeichene coina. ¹⁹Jana inara lananein inara comasaihuru belaaain neeuche, jiaonriha inara comasaihuru cotaairiin coaraqichene.

²⁰Canaanaihuru nihanatiin, rai fojiaraauru ere tonoraain neeuruhine. Nitohanein neite rautaaain coarae Cana Curuaanaa Jesocurisito. ²¹Jiaonrihachu, inara acauru inacanein, inara bereecuru baijiaain neeichene, nabana caoacha coroaecuruhane jianecuruhane coataa.

²²Fatoroon letononein nenacaauru, cau chauratane que acauru fatoronein nenacaauru ere tonoraain neeuruhine. Jiaonriha coarajeeuruhane notaracaecha acauru belaihuruhane jerenacauncha acauru ere tonoraain neeuruhane. Coaracurenihane jana nihanatiin, suujua aina cutaain, jerecuruha acauru fatorooncurune rijijieein neeuruhine, nitohanein jeriha Cana Curuaanaa Jesocurisitone jaun.

²³Itolere inaraacha ichai ichaain

neeichene, esinae rauhijiriin corajeein ichacuche, inara amute cacha rai ichaquichene que coacuelanaala, Jesocurisito rai ichara rijitjoeein.

²⁴Inarate inae ecu tihane bana, inara rai aca cana Curuaanaa nihane rai niicha jerei ichara neein neeichene jaun, rainein nenea que inara coreterihani Cana Curuaanaa Jesocurisitone coitucuhiche raotjoeein. ²⁵Nii choae tacaain coatiha nejelaunein chuni coaraain nihei Cana Coaunera.

4 ¹Inara, fatoroon neeichene, inara letonocuru aina caohachaaain inara suujua coaraain, rauhijiriin acauru aina neeuche. Inara netonai leinjiin dedeeu nenea Curuaanaa letononein neeichene jaun, rai inaraacha ichai beeichene rai neeichene que nainaaain ichaaoche.

²Itolere bana Cana Coaunera corojeein bajaee bajajeein itolere que nainaaain ichaaoche. ³Canacaanu rai netonai Cana Coaunera bajaachete canacaanu rai acuujuu joracaaine ne itolereenein kuhin Jesocurisito que Erenaa coitucueraelanaala nenea- niicha beratei beebejihacaanu. Nii coitucueraelanaala nenea Erenaa canuhacha beebejei corenihane, caa caresero cuhane neeun. ⁴Cacoreniha Cana Coaunera bajaachene raotjoeein aohana nainecuruhane coina, rauhijiriin nii Erenaa beebeje cachaauru rai.

⁵Chaen techu Cana Coaunera coitucuhichuru que caohacha nejesina ichajeein itolere bana ichaohichene coaratein, caohachaaain coacuhin nii canaacha esenetai que acauru rai raotjoeein beebejeeche caeneenejelanaala. ⁶Nitohanein ereeichene raotjoeein ereeuchete itolere bana rautatiin aonacurumiin aohanrauru. Chaen tonaain ereeuruhane nihanatiin, raotjoeein baaso coacuelanaala acauru tonoraain neeuche.

Necoiha Faborone

⁷Canu suujua rijijieein, Jesocurisito icharatenohi amihanenaa que cacorataa-nera- jataain canuhacha belaa- Jesocurisito coreniha cana nejera Tiquicote, inara rai canu benaa bereein. ⁸Nii coinane inara rene aca letoaaun, inara rai: “Naaonjoaaine nihacaanu,” naain inara suujua lararajiaane coina. ⁹Ainate uhe inara laurijiranein nenaalu- jataain canuhacha belaa- Jesocurisito coreniha cana nejera Onesimo. Acaaurute inara rai caaelai benaa beeurureein. ¹⁰Canu aina caresero cuhane nena- Arisitarocote, inara coacue. Chaen Berenabean calaohiriji- Maroco netonaite inara coacue. Inae inara rai bihanulune rijijieein, inara rene bedainiha nii Marocone raotojoein raauche. ¹¹Chaen techu Josto neein acaauruhacha curuaatei- Jesoso netonai inara coacue. Acaauruhachate canu araaichuru- Jorioocuru caje, Cana Coanera icharatenohi amihanenaa que cacorataa-neranein, jataain canu suujua nunaeranein neeure. ¹²Inara laurijiranein nenaalu Jesocurisito cachanein nena- Efaforasite inara coacue. Acate itolere bana inara rai Cana Coanera bajaee bajaenaja que, leeocho ichana coacue- lanaala itolereinein Cana Coaneraacha jerei ichaquichene coina. ¹³Canune

nitohanein, Laodiseau nenacaauru, Erapolisiu nenacaauru, chaen inara, naaonjoaaineeichene que, jataain coaauunajaoca nii Efaforasine coarajenajacoon. ¹⁴Canuhacha belaa-inein nena- docotoro Locasi netonaite inara coacue, chaen Demasi netonai.

¹⁵Laodiseau nenacaauru Jesocurisito coreniha cana nejeranein nenacaauru rai acaauru coaaucaanne beeuhe. Chaen Ninfasi aina rai loreri asaae netaojianacaauru coaaucaanne beeuhe. ¹⁶Inae nainain caa inara rai canuhacha laenai quiricha reretaain coaraquichene nainaquichene, Jesocurisito ranojonein Laodiseau nenacaauru rai letoaauchete, acaauru netonai reretaain coaracurumiin. Acaauru netonai, acaauru rai quicha letoai quiricha, letoaauruha inara rene ne, reretaain coaracuche inara netonai. ¹⁷Chaen Arquivo rai: “‘Atiin ichei Cana Curuaanaacha icharatei amihanenaa ichaauje, nii icharatihalune rijijieeincha.’ naainte ichei nere letoae Faboro,” naain beeuhe.

¹⁸Inae satonotichaaunne raine Canu Faboronichaaune caraajenhane, caa quiricha cuhane inara coaaucaanne laenaun. Atiin Caresero cuhane nihanune que coaacuche. Jeelai amuritoheriin inara coroatajanemiin Cana Coanera.